

Titynillus: Hau, hau! Lucifer, je reviens;  
Vous ay-je point trop fait attendre?  
Lucifer: Faux mastin, je te feray pendre;  
Pourquoy as-tu tant demouré?  
Tintynillus: Lucifer, je le vous diré.  
J'ay esté par tous ces monstiers,  
Comme aux Carmez, au Cordeliers,  
Aux Augustines, aux Jacobinz,  
Aux Bernadinz, aux XV<sup>xx</sup>,  
Aux Blans-Manteaux et aux Billettez,  
Aux Filles-Dieu et au Nonnettez,  
Aux Recluses, aux Corcelierez,  
Et puis j'ay adressé mes alez  
En cez eglisez cathedralez,  
Où il y a sy gras chanoinez.  
J'ay esté après sur ces moyennez  
Blans et noirz et sur ces hermitez,  
Qui contrefont lez ypocritez,  
Et ay mis en j. papier|groz  
En escript lez vers et lez mos  
Qu'ilz ont laissé choir en disant  
Leur heurez: g'y estoye duisant,  
Qui m'eust laissé jusqu'à démain,  
Ves-en cy j. grant sac tout plain:  
Il y a au feillet premier  
Les matinez d'un cordelier,  
Qui laissa j'en suis souvenant,  
Le jour de karesme-prenant  
Pour aler boire du meilleur.  
Vezcy la prime d'un prescheur  
Qui estoit appelé *dan Jaque*,  
Qu'il oublia le jour de Pasque  
Derrainez, j'en suis assurez.  
Vecy lez vesprez d'un curé,  
Qu'il laissa, et lez kiriellez,  
Pour aler souffler lez chandellez  
Qui ardoient trop longuement.